

## Vraag 26: Wat is God die Vader?

Materiaal vir stiltetyd, kleingroepe of families.

RUS

Gebruik Psalm 68:6-7: “'n Vader vir wese, 'n beskermmer van weduwees; dit is God in sy heilige woning. God gee aan die eensame 'n tuiste; dié wat gevange is, lei Hy na vryheid, maar opstandelinge woon in 'n verlate woestyn.” (NLV)

HOOR

**1. Hoe dink jy oor God die Vader? Hoe sou jy Hom beskryf? Hoe beïnvloed jou ervaring van jou eie pa jou perspektief op God as Vader? En jou ervaring van ander pa's?**

**2. Lees my antwoord en oordink dit.**

**Die Vader is die oorsaak, oorsprong en begin van alles.** Hy is die almagtige Skepper van hemel en aarde van alle sigbare en onsigbare dinge. Saam met die Seun en die Heilige Gees is Hy die ware en ewige God. Op Hom vertrou ek so dat ek nie twyfel dat Hy my, met alles wat vir liggaam en siel nodig is, sal versorg nie.



**3. Lees die bekendstelling van God as Vader aan Dawid in 2 Samuel 7:1-17. Wat tref jou?**

**4. Lees my opmerkings daaroor. Oordink dit.**

God is die oorsaak, oorsprong en begin van alles; die Almagtige, die Skepper van die hemele en die aarde. Hy maak Homself bekend as Vader. Dawid wou vir God 'n huis bou. God herinner hom dat Hy vir Dawid gesorg het vandat hy 'n skaapwagter was. God was oral by hom. God het hom rus gegee van al sy vyande. Die Here bou vir Dawid 'n koningshuis. Sy seun sal 'n groot koning wees: “Ek sal vir hom soos 'n vader wees, en hy sal vir My 'n seun wees.” Dit belowe God vir elkeen wat in Hom glo. God is 'n Vader vir sy kinders.

LEEF

**5. Lees Heidelbergse Kategismus 26 se antwoord op die vraag: Wat is die Vader?**

*Vraag: Wat glo jy as jy sê: Ek glo in God die Vader, die Almagtige, die Skepper van die hemel en die aarde?*

*Antwoord: Ek glo dat die ewige Vader van ons Here Jesus Christus wat die hemel en aarde met alles wat daarin is, uit niks geskep het (a) en deur sy ewige raad en voorsienigheid nog onderhou en regeer (b), ter wille van sy Seun Christus my God en Vader is. (c) Op Hom vertrou ek so dat ek nie daaraan twyfel dat Hy my, met alles wat vir liggaam en siel nodig is, sal versorg nie (d). Hy sal ook al die kwaad wat Hy in hierdie jammerdal oor my beskik, tot my beswil verander (e), omdat Hy dit as 'n almagtige God kan (f) en ook as 'n getroue Vader wil doen (g).*

*(a) Gen 1 en 2; Eks 20:11; Job 33:4, 38, 39; Hand 4:24; 14:15; Ps 33:6; Jes 45:7. (b) Hebr 1:3; Ps 104:27-30; 115:3; Matt 10:29; Ef 1:11: (c) Joh 1:12; Rom 8:15; Gal 4:5-7; Ef 1:5. (d) Ps*

55:23; Matt 6:25, 26; Luk 12:22. (e) Rom 8:28: (f) Jes 46:4; Rom 10:12. (g) Matt 6:32, 33; 7:9-11.

**Is dit hoe jy oor God as Vader dink en wat jy ook van Hom glo?**

VIR DIEPERDELWERS

### **Nederlandse Geloofsbelydenis 8**

*GOD IS EEN IN WESE EN ONDERSKEIE IN DRIE PERSONE*

Ons glo volgens hierdie waarheid en hierdie Woord van God in 'n enige God, een enige Wese, in wie drie Persone is, naamlik die Vader en die Seun en die Heilige Gees, wat in werklikheid en in waarheid en van ewigheid af onderskeie is volgens die eienskappe wat hulle nie met mekaar deel nie.

- Die Vader is die oorsaak, oorsprong en begin van alle sigbare en onsigbare dinge.
- Die Seun is die Woord, die Wysheid en die Beeld van die Vader.
- Die Heilige Gees is die ewige Krag en Mag wat van die Vader en die Seun uitgaan.

Nogtans volg uit hierdie onderskeiding nie dat God in drie gedeel is nie, aangesien die Heilige Skrif ons leer dat die Vader en die Seun en die Heilige Gees elkeen sy eie selfstandigheid het, deur sy eienskappe op so 'n wyse onderskei dat hierdie drie Persone slegs een enige God is. Dit is dus duidelik dat die Vader nie die Seun en die Seun nie die Vader is nie; eweneens dat die Heilige Gees nie die Vader en ook nie die Seun is nie.

Nogtans is hierdie Persone, wat so onderskeie is, nie gedeel nie en ook nie onderling vermeng nie. Want die Vader en die Heilige Gees het nie vlees aangeneem nie, maar slegs die Seun. Die Vader was nooit sonder sy Seun of sy Heilige Gees nie, want al drie is van gelyke ewigheid in een en dieselfde Wese. Daar is nie 'n eerste of 'n laaste nie, want al drie is een in waarheid, mag, goedheid en barmhartigheid.

1 Kor. 1:24; Joh. 1:14; 1 Joh. 1:1; Op. 19:13; Spr. 8:22; Kol. 1:15; Matt. 28:19; 3:16-17; Joh. 1:14; Mig. 5:1.